

VENDIM
Nr.193, datë 9.3.2011

PËR SHPRONËSIMIN, PËR INTERES PUBLIK, TË PRONARËVE TË PASURIVE TË PALUAJTSHME, PRONË PRIVATE, QË PREKEN NGA NDËRTIMI I NËNSTACIONIT 400/220/110 KV, TIRANA 2, NË KASHAR, TIRANË

Në mbështetje të nenit 100 të Kushtetutës dhe të neneve 5, pika 1, 20 e 21 të ligjit nr.8561, datë 22.12.1999 “Për shpronësimet dhe marrjen në përdorim të përkohshëm të pasurisë, pronë private, për interes publik”, me propozimin e Ministrit të Ekonomisë, Tregtisë dhe Energjetikës, Këshilli i Ministrave

VENDOSI:

1. Shpronësimin, për interes publik, të pronarëve të pasurive të paluajtshme, pronë private, që preken nga ndërtimi i nënstacionit 400/220/110 kV, Tirana 2, në Kashar, Tiranë, sipas tabelës që i bashkëlidhet këtij vendimi.

2. Shpronësimi të bëhet në favor të OST sh.a.

3. Pronarët e pasurive të paluajtshme që shpronësohen, të kompensohen në lekë, në vlerë të plotë, sipas masës përkatëse të kompensimit, që paraqitet në tabelën që i bashkëlidhet këtij vendimi, për sipërfaqen 6 059 (gjashtë mijë e pesëdhjetë e nëntë) m² tokë bujqësore arë, vlerësuar në shumën e përgjithshme prej 19 174 560 (nëntëmbëdhjetë milionë e njëqind e shtatëdhjetë e katër mijë e pesëqind e gjashtëdhjetë) lekësh.

4. Fondi prej 19 174 560 (nëntëmbëdhjetë milionë e njëqind e shtatëdhjetë e katër mijë e pesëqind e gjashtëdhjetë) lekësh të përballohet nga fondet e OST sh.a.

5. Vlera e shpenzimeve procedurale të shpronësimit, në shumën 361 000 (treqind e gjashtëdhjetë e një mijë) lekë, të përballohet nga OST sh.a., si subjekt kërkues i këtij shpronësimi.

6. Shpronësimi të fillojë brenda muajit shkurt 2011 dhe të përfundojë brenda muajit gusht 2011.

7. Mënyra e pagesës të bëhet pas paraqitjes së dokumenteve të pronësisë, sipas ligjit nr.8561, datë 22.12.1999.

8. Punimet për ndërtimin e nënstacionit 400/220/110 kV, Tirana 2, në Kashar, Tiranë, të përfundojnë brenda muajit gusht 2011.

9. Ngarkohen Ministria e Ekonomisë, Tregtisë dhe Energjetikës dhe OST sh.a., për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha